

喊魂

李得福

記得細人仔時節（大約係民國五十年初該下）佢讀小學，老弟老妹正經在嬰兒時期，有時節分突然个聲響抑係爺哀講話忒大聲青驚嚇著，暗晡頭會緊噉毋睡目个時節，佢會搵手搵嬰兒車、搖晃槓仔，噢騙老弟老妹睡目「噢噢睡--」。這時節阿姆會搵等老弟老妹行來行去手緊搖，嘴項念著：「搖啊搖～儘快睡目啲！」若係繼續緊噉無停，阿婆就會講：「這個細人仔嚇著咧，愛去灶君爺面前講一下，將魂魄喊歸來！」

阿婆就會點三支香，在屋肚灶下奉祀个灶君爺神像面前稟告懇求講：「灶君爺，弟子安到李劉順妹，今晡日有本家孫仔李大同，今年一歲，因為分大人講話忒大聲嚇著地，睡毋得又噉無停，懇求灶君爺將厥个魂魄帶歸來！」稟告後，阿婆就拿等香對灶下向阿姆个間房慢慢地行，緊行嘴項細聲地緊喊：「灶君爺將大同个魂魄帶歸來咧！」徑直喊到阿姆个間肚仔，阿姆也搵等老弟在眠床前等，看到阿婆一行啊入間肚个時節，就儘快接聲喊：「灶君爺將大同个魂魄帶歸來咧！」連續緊複誦這句話。

有人接聲做得增加喊魂个效果，阿婆先將手項擎等个香在老弟个心肝前攞三下，再在老弟个背囊心輕輕地拍三下，口中用客家話唸：「膽膽大！無嚇著，嚇石頭！」恁呢做過後蓋神奇，老弟就無再過噉

眇，一下地就睡忒咧。

民國七十年代，佢个細人仔出世後，有時節分冲天炮聲抑係大貨車个喇叭聲嚇著，共樣噉無停面色雪白，還會屙青屎个時節，阿姆就會講：「這個細人仔俾嚇著元神地，愛將魂魄喊歸來！」伊對阿婆該學到个喊魂技術用在孫女身項，還加上自創个客家話用語：「孫女日裡乖乖奈，夜裡乖乖睡，乖乖長大食到百二十歲！」最後還會緊念：「灶君爺將秀香个魂魄帶歸來咧！」